

आकाशवाणी जयपुर-अजमेर
प्रादेशिक समाचार

- केन्द्र सरकार प्रधानमंत्री गरीब कल्याण अन्न योजना री मियाद आवता पांच साल सारू बधायी—महिला स्वयं सहायता समूहां ने ड्रोन मुहैया करावण सारू केंद्रीय योजना ने मंजूरी दीरीजी।
- राज्य मांय विधानसभा चुनाव सारू पड़्या वोटों री गिणती री तैयारियां जोरां माथे— मतगणना दलां ने आज ऑनलाइन सिखावण दीरीजी।
- चीन मांय सांस री बीमारी रा मामलां मांय बधोतरी ने ध्यान राखता थकां राज्य मांय चिकित्सा विभाग सावचेत व्हयो—आज चिकित्सा संस्थानां मांय मॉकड्रिल करी ज्यी।

अर

- प्रदेश रा न्यारा—न्यारा हलकां मांय हल्की बिरखा ऊं ठण्ड रो असर बधयो— केई जिलां मांय कोहरा रो असर।

प्रधानमंत्री गरीब कल्याण अन्न योजना री मियाद एक जनवरी 2024 ऊं और पांच साल सारू बधा दीरीजी है। ई योजना रा तैत देश मांय गरीब तबका रा 81 करोड़ लोगां ने हर महीना पांच किलोग्राम अनाज मुफ्त दियो जावे है। सूचना अर प्रसारण मंत्री अनुराग सिंह ठाकुर नई दिल्ली मांय खबरनवीसां सागे बातचीत करता थकां केंद्रीय मंत्रिमण्डल रा ई फैसला री जाणकारी दीनी।

000

केंद्रीय मंत्रिमण्डल महिला स्वयं सहायता समूहां ने ड्रोन मुहैया करावण री केंद्रीय योजना ने ई मंजूरी दे दीनी। मंत्री ठाकुर बतायो के ई योजना रा तहत साल 2023-24 ऊं 2025-26 बीचे चुणी ज्या 15 हजार स्वयं सहायता समूहां ने ड्रोन मुहैया कराया जावेला, जो खेती-बाड़ी ऊं जुडी सेवावां सारू किसानां ने भाड़ा माथे देवण मांय काम लिया जावेला। ई योजना सारू एक हजार 261 करोड़ रुपया आवंटित करी ज्या है।

000

मंत्री ठाकुर बतायो के केंद्रीय मंत्रिमण्डल 16वां वित्त आयोग रा कामकाज अर दायित्वां ने ई मंजूरी दे दीनी। केंद्रीय मंत्रिमंडल फास्ट ट्रैक विशेष अदालतां ने तीन साल और जारी राखण री मंजूरी ई दे दीनी। एक हजार नौ सौ 52 करोड़ रुपया ऊं बत्ती रकम रा प्रावधान सागे फास्ट ट्रैक विशेष अदालतां अब 31 मार्च 2026 ताई चालेला। इण मांय केन्द्र रो हिस्सो निर्भया कोष ऊं दियो जावेला। फास्ट ट्रैक विशेष अदालतां साल 2019 मांय सरू करी ज्यी ही। मंत्रिमंडल नौ मंत्रालयां रे मार्फत 11 खास कार्यक्रम माथे ध्यान देवण सारू प्रधानमंत्री जनजातीय आदिवासी न्याय महा अभियान ने ई मंजूरी दे दीनी है। ई सारू 24 हजार एक सौ चार करोड़ रुपया रो प्रावधान करी ज्यो है। प्रधानमंत्री नरेंद्र मोदी जनजातीय गौरव दिवस रे मौके खूटी ऊं ई अभियान रो ऐलाण कीनो हो।

000

विकसित भारत संकल्प यात्रा रा तैत केंद्र सरकार कानी ऊं चलायी जा रही जनता रा भला री योजनावां रो फायदो लेवण वाळां सागे प्रधानमंत्री नरेंद्र मोदी काल वर्चुअल तरीका ऊं बातचीत करेला। ई मौके प्रधानमंत्री महिला किसान ड्रोन केंद्र री सरूआत ई करेला। ई पहल रा तैत महिला स्वयं सहायता समूहां ने ड्रोन दिया जावेला, ताकि ई प्रौद्योगिकी ने काम कमाई सारू काम ली जा सके। आवता तीन साल मांय महिला स्वयं सहायता समूहां ने 15 हजार ड्रोन मुहैया कराया जावेला। ई सागे ई महिलावां ने ड्रोन उडावण अर वां ने काम लेवण ऊं जुडी जरूरी सिखावण दी जावेला। ई कार्यक्रम मांय प्रधानमंत्री एम्स-देवघर मांय 10 हजार वॉ जन-औषधि केंद्र सूपेला। प्रधानमंत्री देश मांय जन-औषधि केंद्रां री तादाद 10 हजार ऊं बधा र 25 हजार करण रा कार्यक्रम रो ई उद्घाटन करेला।

000

प्रधानमंत्री नरेन्द्र मोदी उत्तराखंड मांय सिलक्यारा सुरंग ऊं 17 दिन पाछे निकाली ज्या मजूरों सागे टेलीफोन रे जरिये बातचीत कीनी। मजूरों ने निकाल्या पाछे प्रधानमंत्री वां ने कामयाबी सागे पूरी हिफाजत ऊं बाहर निकालवा सारू बचाव टीमां री कोशिशों री सराहावणा कीनी।

000

राज्य मांय विधानसभा चुनाव सारू पड़्या वोटों री 3 दिसम्बर ने करी जावण वाळी गिणती सारू वोटों री गिणती करण वाळा दलां ने आज ऑनलाइन तरीका ऊं सिखावण दीरीजी। सगळा जिला निर्वाचन अहलकारां, उप जिला निर्वाचन अहलकारां, रिटर्निंग अहलकारां, अतिरिक्त रिटर्निंग अहलकारां अर आईटी स्टाफ ने ई सिखावण सत्र मांय शामिल करी ज्या। ई दौरान ईटीपीबीएमएस मतगणना, डाक मतपत्र गिनती अर ईवीएम मतगणना रा बारा मांय सिखावण दीरीजी। वोटों री गिणती पूरी साफगोई सागे करावण सारू भारत निर्वाचन आयोग कानी ऊं काम ली जा चुकी 'मैडेटरी वैरीफिकेशन' पद्धति ई लागू करी जावेला। इण मांय वोटों री गिणती पूरी व्ह्यां पाछे हर विधानसभा हलका रा मतदान केंद्रां ऊं लॉटरी रे जरिए 5-5 वीवीपैट चुण र वां री पर्घियां री गिणती कर र ईवीएम मांय मिल्या वोटों ऊं मिलान कर्यो जावेला। ओ काम रिटर्निंग अधिकारी-सुपरवाईजर री निगरानी अर उम्मीदवार या वां रा एजेंटों सामी वीवीपैट मशीन ऊं निकळी पर्घियां रो वोटों ऊं मिलान कर्यो जावेला। ध्यान-जोग है के राज्य विधानसभा री 199 सीटां माथे चुनाव सारू पड़्या वोटों री 3 दिसम्बर ने करी जावण वळी गिणती सारू 36 केन्द्र बणायी ज्या है। आं मांय जयपुर, जोधपुर अर नागौर सारू 2-2 अर बाकी जिलां मांय एक-एक ठौड़ वोटों री गिणती करी जावेला। ई बीचे प्रदेश रा न्यारा-न्यारा जिलां मांय वोटों री गिणती मांय लाग्योडा कर्मचारियां री सिखावण राखी ज्यी। डूंगरपुर रा राजमाता विजयाराजे सिंधिया ऑडिटोरियम हॉल मांय सिखावण शिविर लागायी ज्यो। दौसा रा पी.जी कॉलेज मांय मतगणना कर्मचारियां ने सिखावण दीरीजी। सवाईमाधोपुर मांय मतगणना कर्मचारियां ने ईवीएम ऊं जुड्या अर बिना दुभांत कर्तव्यनिष्ठा सागे वोटों री गिणती करावण रा बारा मांय दिशा-निर्देश दिया ज्या। बारां मांय मतगणना दल रा कर्मचारियां ने सरकारी पॉलिटिकनिक कॉलेज मांय सिखावण दीरीजी।

000

चीन मांय सांस री बीमारियां रा मामला मांय बधोतरी ने ध्यान राखता थकां आज प्रदेश रा मेडिकल कॉलेज ऊं जुड्या अस्पतालां ऊं ले र प्राथमिक स्वास्थ्य केन्द्रां ताई ईलाज रा सुबीता री जांच सारू मॉकड्रिल करी ज्यी। ई दौरान बिस्तर, जांच, दवाई, एम्बुलेंस, मानव संसाधन अर जरूरी साज-ओ-सामान माथे निजर राखी ज्यी। स्वास्थ्य विभाग मांय जन स्वास्थ्य रो काम देख रह्या निदेशक डॉ. रवि प्रकाश माथुर सगळा चिकित्सा संस्थानां मांय जांच, दवा, अर ईलाज रा जरूरी इंतजामात तैय करण रा हुकम दीना है। विभाग चिकित्सा संस्थानां मांय भर्ती सीवियर एक्यूट रेस्पिरेटरी इन्फेक्शन रा मरीजां री रेंडम सैम्पलिंग करण रा ई हुकम दीना है। डॉ. माथुर आकाशवाणी ने बतायो के हाल ताई देश मांय चीन मांय फैल रही बीमारी सरीखो कोई मामलो सामी नी आयो है पण सावचेती रा तौर ऊं महकमो सावचेत है।

000

डॉ. माथुर बतायो के राज्य मांय डेंगू अर चिकनगुनिया रा मामला ई अब कम व्हे रह्या है, हालांकि मौसम मांय बदलाव रे कारण वायरल रा मरीजां री तादाद बधी है। न्यारा-न्यारा जिलां ऊं अस्पतालां मांय मॉकड्रिल करी जावण रा समाचार मिल्या है। बूंदी रा जिला अस्पताल अर जनाना अस्पताल समेत ब्लॉक रा न्यारा-न्यारा चिकित्सा संस्थानां मांय जिला स्तर रा अहलकार खुद मॉकड्रिल रो जायजो लीनो। बांसवाड़ा मांय करी ज्यी मॉकड्रिल मांय 107 वेंटिलेटर, 1575 बैड अर 17 ऑक्सीजन प्लांट दुरुस्त मिल्या।

000

प्रदेश मांय न्यारी-न्यारी ठौड़ां हल्की बारिश व्हेवण ऊं ठण्ड रो असर बध ग्यो है। राजधानी जयपुर, सवाईमाधोपुर अर टोंक समेत केई ठौड़ां बादळा मण्ड्या रह्या जद के भरतपुर, बाडमेर, करौली, बारां, भीलवाड़ा, चित्तौड़गढ़, कोटा अर झालावाड समेत केई जिलां मांय संवारे कोहरो रह्यो। घणखर जिलां मांय दिन री बगत तापमान सामान्य औसत ऊं नीचे चाल रह्यो है। सिरोही मांय अधिकतम तापमान उतर र 18 दशमलव 8 डिग्री सेल्सियस दर्ज करी ज्यो। वठे रात री बगत ई पारो सब ऊं कम 10 दशमलव 4 डिग्री सेल्सियस दर्ज करी ज्यो। प्रदेश मांय औसत न्यूनतम तापमान 17 डिग्री सेल्सियस ताई आ ग्यो है। ई बीचे मौसम विभाग जयपुर, भरतपुर, कोटा अर उदयपुर संभाग मांय शुक्रवार ताई हल्की बिरखा व्हेवण रा आसार जताया है।

000